

Kalaallit Nunaanni ilinniarnertuunngorniarniit pillugit inatsit

UAGUT MARGRETHE AAPPAAT, Guutip saammaanneranik Danmarkip Dronningia, imaaliorpugut:

Folketingip akueraa aamma Uagut akuersinitsigut inatsit manna aalajangersarpaa:

§ 1. Kalaallit Nunaanni ilinniarnertuunngorniarniit pillugit malittarisassanik Namminersornerullutik Oqartussat inatsisartut peqqussutaatigut aalajangersaassapput.

§ 2. Ilinniarnertuunngorniarniit ammapput kikkunnulluunniit Kalaallit Nunaanni najugalinnut, piginnaasaasinnaasullu tungaasigut ilinniartunngornissamut piumasaqaatinik Namminersornerullutik Oqartussat aalajangersagaannik naammassinnittunut.

§ 3. Ilinniarnertuunngorniarniit ilinniarneq akeqanngilaq, taamaattoq tak. imm. 2 aamma 3. Ilinniutit, ilinniarnermi pisariaqartut, ilinniarniit ilinniartunut akeqanngitsumik atugassanngortinneqassapput, tak. imm. 4.

Imm. 2. Ilinniartut takusassarsioqataanernut il.il., ilinniarnermut attuumassuteqartunut, akileeqquneqarsinnaapput. Aningaasartuutinulli ilinniarnermut imaluunniit ilinniartitsisut peqataanerannut tunngassutilinnut akileeqqusisoqarsinnaanngilaq.

Imm. 3. Namminersornerullutik Oqartussat malittarisassaliorsinnaapput ilinniartut, atuartitsissutinik ataasiakkaanik ilinniartitsinernut malinnaasut, atuartitsinermi misilitsinnermilu peqataanermut akiliuteqartassasut, aamma nammineerlutik ilinniartut, atuartitsinermut peqataaniarlutik allatsissimanatik misilitsinnermut peqataajumasut, misilitsinnermut akiliuteqassasut.

Imm. 4. Namminersornerullutik Oqartussat malittarisassaliorsinnaapput, ilinniartut pikkorissartullu ilinniutinik killilimmik namminneq piniartassasut.

§ 4. Ilinniarnertuunngorniarniit aaqqissuunneqassapput Kalaallit Nunaanni tunngaviumik atuarniit atuartitaanermik pinngitsoorani peqataaffigineqartussamik ingerlatiteqqiinertut tamatumunngalu nalinginnaasumik ilaavoq ukiuni pingasuni atuartitaaneq.

§ 5. Ilinniarnertuunngorniarniit ilinniarnissamut piareersarfiupput tamatigoortumillu ilisimasaqalernissamut tunngavissuupput. Ilinniartitaanernut siunertaavoq ilinniartut Kalaallit Nunaanni, Danmarkimi nunanilu allani ilinniaqqinnissaminnut piginnaaneqalersinneqassasut, taamaattoq tak. imm. 2.

Imm. 2. Namminersornerullutik Oqartussat malittarisassaliorsinnaapput, ilinniarnertuunngorniarniit Kalaallit Nunaanni Danmarkimilu ilinniaqqinnernut sivikitsunut akunnattumillu siviussusilinnut taamaallaat isersinnaatitsisut pillugit.

Imm. 3. Ilinniarnertuunngorniarniit ilinniartitsisut suliamik perorsaanerullu tungaasigut atuartitsissummi ataatsimi arlalinniluunniit piginnaaneqassapput, taamaattoq tak. imm. 4.

Imm. 4. Namminersornerullutik Oqartussat malittarisassaliorsinnaapput, inuit ilinniartitsinissaminnut piginnaaneqanngitsut kikkut ilinniarnertuunngorniarniit piffissami killilimmi ilinniartitsisinnaanerit pillugu.

§ 6. Danmarkimi ilinniaqqinnissanut tigooqqaanermi ilinniartut Kalaallit Nunaanni ilinniarnertuunngorniarfimmi ilinniarsimasut ilinniartunut Danmarkimi ilinniarnertuunngorniarfinni ilinniarsimasunut naligitinneqassapput, ilinniartitaanerup pitsaassusaanut piunasaqaatit naammassineqarsimappata. Piunasaqaatit aalajangersarneqassapput Kalaallit Nunaanni kultureqarnermut, ilinniartitaanerut, ilisimatusarnermut ilageeqanermullu naalakkersuisoqarfik aamma Undervisningsministeriet suleqatigalugit.

§ 7. Inatsit atortuulerpoq ulloq 1. januar 2009.

Imm. 2. Gymasia il.il. pillugu inatsisip, kiisalu annerusumik ilinniagaqarnissamut aamma ilinniagaqarnissamut piareersaataasumik fagini ataasiakkaani inersimasunut ilinniartitsineq il.il. pillugit inatsisip Kalaallit Nunaannut atortuulernissaanut peqqussut nr. 108, 17. februar 1992-imeersoq aamma inuussutissarsiutitigut ilinniarnertuunngorniarluni ilinniarnertuunngorniarfinni qaffasinnerusumik niuernermik soraarummeernermi aamma qaffasinnerusumik teknikkimi soraarummeernermi inatsisip Kalaallit Nunaannut atuutilerneranik peqqussut nr. 787, 20. juni 2006-meersoq atortuutiinnarneqassapput, inatsisartut peqqussutaatigut Namminersornerullutik Oqartussanit suliarineqartukkat atorunnaarsinneqarnissamik tungaanut.

Imm. 3. Nalunaarutit, peqqussutit imm. 2-mi eqqaaneqartut naapertorlugit atuutilersinneqartut, atortuutiinnarneqassapput, malittarisassatigut Namminersornerullutik Oqartussanit suliarineqartutigut atorunnaarsinneqarnissamik tungaanut.

Marselisborg Slot-imi tunniunneqarpoq, ulloq 27. december 2008

Kunngiussutsitsinnik Atsiorpugut Naqissusiillutalu

MARGRETHE R.

/Berthel Harder